

Կարգապահական գործ թիվ ԿԳ-25051

Հայաստանի Հանրապետության փաստաբանների պալատի
Կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱԲԱՆ ՄԱՐԻԵՏՏԱ ԳԱՐԵԳԻՆԻ ՄԻՐԻԲՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ
(ՎԵՐԱՊԱՏՐԱՍՏՄԱՆ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետև նաև՝ Պալատ**) հանձնաժողովը (**այսուհետև նաև՝ Հանձնաժողով**), Հանձնաժողովի նախագահ՝ Տաթևիկ Շալջանի, Հանձնաժողովի անդամներ՝ Վահե Աստվածատրյանի, Կարինե Բաղդասարյանի, Կարեն Խալաթյանի և Արաքս Վարդանյանի կազմով,

Գրավոր ընթացակարգով քննության առնելով փաստաբան **Մարիետտա Գարեգինի Միրիբյանին (արտոնագիր թիվ 2277) (այսուհետև՝ Փաստաբան կամ Պատասխանող)** կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Հայաստանի Հանրապետության փաստաբանական ակադեմիայի (**այսուհետև՝ Ակադեմիա**) ղեկավարի 04.12.2024թ. տեղեկանքի (մուտք՝ 09.12.2024թ.) համաձայն՝ փաստաբան **Մարիետտա Գարեգինի Միրիբյանը 2024թ. առաջին կիսամյակի (հունվար-հունիս)** ամիսներին չի մասնակցել պարտադիր վերապատրաստման որևէ դասընթացի:

2. Կարգապահական վարույթ հարուցելու մասին որոշումը.

Պալատի նախագահի ժամանակավոր պաշտոնակատարի 09.01.2025թ. թիվ 54-Ա/ԿԳ-25051 որոշմամբ կարգապահական վարույթ է հարուցվել Փաստաբանի նկատմամբ՝ «Փաստաբանության մասին» օրենքի (**այսուհետև նաև՝ Օրենք**) 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի 2019 թվականի հոկտեմբերի 19-ի թիվ 1-Լ որոշմամբ հաստատված փաստաբանի վարքագծի կանոնագրի (**այսուհետև նաև՝ Կանոնագիր**) 2.8.2 ենթակետի խախտման հատկանիշներով:

Թիվ ԿԳ-25051-2-Ա
12.05.2025թ.



16.01.2025թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից Գարիկ Հախնազարյանին (**այսուհետև նաև՝ Աշխատակից**):

3. Փաստաբանի համառոտ բացատրությունները.

Սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 14.02.2025 թվականին Դիմողին առաջարկվել է՝ Օրենքի 39.5 հոդվածի 4-րդ մասին համապատասխան, գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Պալատում մուտքագրվել է Փաստաբանի 21.01.2025թ. դիմումը, որով վերջինս հայտնել է, 30.08.2024թ.-ին ծննդաբերել է, և մինչ այդ տարել է ծանր հղիություն, ուստի ի վիճակի չի եղել մասնակցելու վերապատրաստման դասընթացների: Վերապատրաստման կարգի 13.01.2023թ.-ի 2/5-Լ որոշման 5-րդ գլխի 22-րդ կետի «Ժ» ենթակետի համաձայն վերջինս մինչև երեխայի 3 տարեկան լրանալն ազատված է վերապատրաստմանը մասնակցելու պարտավորությունից:

4. Պալատի աշխատակազմի սպասարկող անձնակազմի աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 14.03.2025թ. կազմել է եզրակացություն:

Սույն կարգապահական գործը 14.03.2025թ. հանձնվել է Հանձնաժողովին:

Հանձնաժողովը 18.03.2025թ. կարգապահական գործն ընդունել է վարույթ, նշանակել է զեկուցող, ինչպես նաև կարգապահական պատասխանատվության ենթարկելու հարցի մասին որոշման հրապարակման օր, այն է՝ 12.05.2025թ.:

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) Փաստաբանը 2024թ. առաջին կիսամյակի (հունվար-հունիս) ամիսներին չի մասնակցել պարտադիր վերապատրաստման որևէ դասընթացի: Սույն փաստը հաստատվում է ՀՀ փաստաբանական ակադեմիայի ղեկավարի 04.12.2024թ. տեղեկանքով:

2) Մարիետտա Միրիբյանը ունեցել է վերապատրաստմանը մասնակցելու պարտավորությունից ազատվելու արտոնության հիմք, այն է՝ հղիության երեսուն շաբաթից սկսած մինչև երեխայի երեք տարեկանը լրանալու դեպքը: Սույն փաստը հաստատվում է ծննդյան վկայականի պատճենով:

6. Հանձնաժողովի պատճառաբանված եզրակացությունը և որոշումը.

Հիմք ընդունելով Հանձնաժողովի կողմից հաստատված փաստերը, կարգապահական գործը նախապատրաստող Աշխատակցի եզրակացությունը և քննարկվող իրավահարաբերությունները կարգավորող կանոնները՝ Հանձնաժողովը գտնում է, որ Փաստաբանի հարուցված կարգապահական վարույթը ենթակա է կարճման՝ հետևյալ պատճառաբանությամբ.

Օրենքի 7-րդ հոդվածի 2-րդ մասի 3-րդ կետի համաձայն՝ Փաստաբանների պալատի խնդիրներն են, ի թիվս այլնի, կազմակերպել փաստաբանի ունկնդիրների

մասնագիտական ուսուցումը և փաստաբանների վերապատրաստում:

Օրենքի 10-րդ հոդվածի 4-րդ մասի 6-րդ կետի համաձայն՝ Փաստաբանների պալատի խորհուրդը՝ սահմանում է փաստաբանի անդամավճարի և հավակնորդի մուտքի ու այլ վճարների, փաստաբանների վերապատրաստման համար անհրաժեշտ վճարների չափերը, ինչպես նաև դրանք վճարելու կարգերը:

Օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին, բացառությամբ սույն օրենքով կամ փաստաբանների պալատի կանոնադրությամբ նախատեսված դեպքերի:

Օրենքի 45.12 հոդվածի 2-րդ մասի համաձայն՝ Փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել:

Կանոնագրքի 2.8.2 ենթակետի համաձայն՝ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Պալատի խորհրդի 13.01.2023թ. թիվ 2/5-L որոշմամբ հաստատված «Փաստաբանների վերապատրաստման, դրա համար անհրաժեշտ վճարների չափը սահմանելու և վճարելու կարգի» (այսուհետև՝ Կարգ) 9-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը պետք է անցնի **նվազագույնը 12** (տասներկու) ակադեմիական ժամ (այսուհետև՝ ժամ, 1 (մեկ) ակադեմիական ժամը հավասար է 40 (քառասուն) րոպեի) ժամաքանակով (այսուհետև՝ Նվազագույն ժամաքանակով) վերապատրաստման դասընթացներ:

Կարգի 22-րդ կետի ժբ ենթակետի համաձայն՝ Փաստաբանը վերապատրաստմանը մասնակցելու պարտավորությունից ազատվում է սույն կարգին համապատասխան՝ հղիության երեսուն շաբաթից սկսած մինչև երեխայի երեք տարեկանը լրանալու դեպքում:

Սույն դեպքում փաստաբան Մարիետտա Միրիբյանի կողմից Պալատին ներկայացվել է վերապատրաստմանը մասնակցելու պարտավորությունից ազատված լինելու ապացույց՝ երեխայի ծննդյան վկայականի պատճենը:


Վերոգրյալից ելնելով՝ Հանձնաժողովը գալիս է եզրահանգման, որ վերացել է կարգապահական վարույթ հարուցելու հիմքը:

Օրենքի 39.9 հոդվածի 1-ին մասի 1-ին կետի համաձայն՝ փաստաբանների պալատի կարգապահական հանձնաժողովը կարծում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ առկա չէ կարգապահական պատասխանատվության ենթարկելու հիմք:

Վերոգրյալից ելնելով և ղեկավարվելով Օրենքի 11.1-րդ հոդվածի 3-րդ մասով, 39.7-րդ հոդվածի 5-րդ մասի 2-րդ կետով և 7-րդ մասով, 39.9-րդ հոդվածի 1-ին մասի 1-ին կետով, Հանձնաժողովը՝

Ո Ր Ո Շ Ե Ց՝

1. Փաստաբան Մարիետտա Գարեգինի Միրիբյանի (արտոնագիր թիվ 2277) նկատմամբ Օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Փաստաբանի վարքագծի կանոնագրքի 2.8.2 ենթակետի պահանջների խախտման հարկանիշներով հարուցված թիվ ԿԳ-25051 կարգապահական վարույթը կարճել:



2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել Փաստաբանին:

Ծանոթություն. Սույն որոշումը կարող է բողոքարկվել ՀՀ փաստաբանների պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն Փաստաբանի կողմից ստանալու հաջորդ օրվանից:

**ՀՀ փաստաբանների պալատի
կարգապահական հանձնաժողովի
նախագահ՝**

**Թիվ ԿԳ-25051-2-Ա
12 մայիսի 2025թ.
ք.Երևան**



Տաթևիկ Շալվյան